



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 7

Priyanka Gandhi-i Assam nung "Five Guarantee" campaign tenzüksüogo

2030 tashi nungbo tzü lenmang 23 inyaksangshitsü: PM Modi



VOL. XVIII NO. 138 (ADOK 138) DIMAPUR

RASEMNÜ (WEDNESDAY)

METSÜREMI (MARCH) 03, 2021

₹ 5.00

## COVID-19 Nagaland: Shinga dak meputet; Taneptsü angura maliasü

**Kohima, March 2 (TYO):** Mongulbarnüa Nagaland nung nisung shinga dak-a COVID-19 aliba meputet aser ano taneptsü angura maliasü.

"Tanü COVID-19 putetba mesüra taneptsü angur ka danga maliasü" ta Health & Family Welfare Minister S Pangnyu Phom-i metetdaksü.

Nisung 12,200 rongnungi 11,949 taneptsü nguogo aser tang parnok 7 anepaludar, ta paisa ashi.

Nagaland nung COVID-19 nungi taneptsü angubaji 97.94% lir, ta Health & Family Welfare

Director, Dr Denis Hangsing-ia ashi.

Nagaland nung COVID-19 puteter nisung 91 asü saka parnok 10 bo tanga timtem ajanga asü. Maneni, nisung 153 tashi tanga state temi ogo, ta paisa shisem.

"Nagaland nung COVID-19 alitsü akok ta temolung melemi bilemba sample 1,30,743 tendangogo. RT-PCR ajanga sample 74,774, TrueNat ajanga sample 37,351 aser Rapid Antigen Test ajanga sample 18,618 tendang" ta Dr Hangsing-ia metetdaksü.

## Governor R N Ravi-i Covid vaccine agiogo

**Dimapur, March 2 (TYO):** Nagaland Governor R N Ravi-i Mongulbarnü AIIMS New Delhi nung Covaxin agiogo, ta PRO to Governor-i sangdong ka nung metetdaksü.

Covaxin nung lendong kecha mali aser nisungtemi Covaxin mesüra Covishield vaccine mashii ka agitettsü. India nung scientist temi meimchir nem sempet tajung agütsüba atema Governor RN Ravi-i pelaba

metetdaksü, ta sangdong nungsa shia lir.

Tesüiba küm ka shi alima nung wara tulu agi kangshia arudang India nung vaccine yanglutetba atema senso shia nüma atangtsüla. India ya alima nung vaccine yangludak tongtiba lir. Nagaland nung alirtemi vaccine agitsü aser linüki COVID 19 samadaksüba nung yariteptsü imlar, ta RN Ravi-isa ashi.

## May tashi nung Covid-19 vaccine 2 angutsü

**New Delhi, March 2 (Agencies):** India nung vaccine candidates 30 shi ka tang tendangdar aser item nungi taruba hopta 4-6 tsüngda Russian Sputnik V yangluzüksü, ta Operations Research Group of the COVID-19 Task Force mendenbuba Dr NK Arora-ia ashi.

"May ita tatemlen tashi nung Zydus Cadila vaccine yangluzüksü. Iba vaccine agirtem dak allergy timtem adokba balaka maliasü. Nisung

15,000 nungi 1 dak dang timtem adokba nguogo" ta Dr Arora-ia metetdaksü.

January 16, 2021 nungi alima nung vaccine agütsüba maparen tulutiba India nung tenzükä liasü.

Tang tashi nung India nung Serum Institute of India-ia yangluba Covishield aser Hyderabad nung Bharat Biotech indang Covaxin vaccine tem agütsür. Covishield yabo AstraZeneca aser Oxford University ajanga yanglutetba lir.

## ECI-i telemsa tasen 3 atema postal ballots inyakyim tenzüksür

**Guwahati, March 2 (Agencies):** Election anogo nung polling booths (absentee voters)-i maruteteritem atema Election Commission of India (ECI)-i inyakyim tasen kar tenzüksüogo.

Absentee voters nung persons with disabilities (PwD), teintet rogotem aser essential services, railways, state transport, & aviation amala nung inyakeritem dena lir.

ECI-i tang mezüngbuba atema teintet rogotem (arishi küm 80 ser tempur), persons with disabilities/differently-abled (PwD), essential services mapa inyakeritem aser quarantine (home and institutional) nung alir COVID positive/suspects asoshi postal ballot facility tenzüksüogo.

Absentee voters-i postal ballot ajanga vote enoktsünüra pei

constituency nung Returning Officer (RO) dangi Form-12D nung application ka zülutsüla.

Application Form-12D nung nisungji absentee category kübok adener ta asüba certificate/instructions agütsütsüla.

Vote enoktsürji PwD telemsa kübok denra, pa/lai application den külemi benchmark disability certificate agütsütsüla. Ibaji Rights of Persons with Disabilities Act, 2016 kübok bangdak sorkar ketdangpur kati kuli agütsütsüla.

Covid-19 alitsü akok ta temolung melemi bilemer mesüra keta alir kati RO dang medical certificate dener temepishiba agütsütsüla.

Iba ama application ya election agitsü osang sangoktsüba sülen anogo 5 tashi agütsütsüla.

## Nagaland nung Air Cargo Services tenzükogo



Dimapur, March 2 (TYO): Nagaland chief minister Neiphiu Rio-i Mongulbarnü Dimapur airport nungi mezüngbuba Air Cargo Services tenzüksüba noksa nung angur.

**Dimapur, March 2 (TYO):** Nagaland chief minister Neiphiu Rio-i Mongulbarnü Dimapur airport nungi mezüngbuba Air Cargo Services tenzüksüogo.

March 2, 2021 nü CM Rio-i Dimapur Airport nungi perishable, non-perishable fruits & vegetables aser oset cartoon 111 bener yok.

Iba mapa ya Department of Horticulture, Nagaland aser Airport Authority of India külemi yaritepa inyaker aser airline partners ji Air India aser Indigo lir.

"Nagaland nung ali rongsen talubosa moaja lir aser tsünüsenbongtsü aika adoker. Asenoki aika tsünütettsü lenmang sadema lir, saka air cargo services maliba ajanga tsünüsenbongtsü aika tsünübaji amajok dang

akümer" ta Rio-i ashi.

Air Cargo Services ajanga shishilembaba maparen tulu inyaktettsü. Iba ya aluyimertemi aser entrepreneurs atema tayongzükba tulu ka lir" ta paisa ashi.

Department of Agri & Allied-ia alu mesüra pilot basis nung inyakba dang masü saka entrepreneurs-i supply chain nung yariteptsü atema tashi agütsütsüla, ta CM Rio-isa ashi.

"Aluyimertemi tsünütetbatem meraksadang tekaratiba nung air cargo station tongtsütsüla. Aluyimertemi aser entrepreneurs-i tajungba shishilembatsü atema tesayubatem agütsütsü nüngdaker" ta paisa metetdaksü. Horticulture & Border Affairs

Advisor, Mhathung Yanthan-ia sendaka alir ajaki iba facility nungi tajangzük agia rongsenkettsüng jenjang tajungba akümtsü ayongzük.

"Nagaland nung Air Cargo Services tenzükba ajanga state indang rongsenkettsüng dak sendakba maparen nung tulu ka kongshitsü amanger," ta Mhathung-isa ashi.

Airport Authority of India-i Dimapur nung infrastructure tajungba kümdaksütsü atema kanga meranga inyaka arur, ta Regional Executive Director, Airport Authority of India, North East region, M. Suresh-ia ashi.

AAI-i Dimapur nung cargo service terminal dena terminal building tasen ka yanglutsü sentong lir. Iba nung modern facilities ajak alitsü. Anungji state sorkari additional aser terminal buildings tasen yanglutsü yaritsüla, ta M. Suresh-isa metetdaksü.

"Tsünüsenbongtsü shishilembatsü atema regulatory body ka tentettsüla. Anogoshia, Air India aser Indigo tayimtsütem ajanga Nagaland nungi tanga state temi tsünüsenbongtsü metric tons 2 bener yoktsü" ta Horticulture Department Director, Dr Elithung Lotha-ia metetdaksü.

Iba sentong nung mendenji Commissioner & Secretary, Horticulture Department, Anenla T. Sato liasü aser Thilixu Village Baptist Church, Dimapur Senior Pastor Rev. Dr. Hevukhu Achumi-i meshiteta sarasadem.

## ULFA (I)-i tanü Quippo nung mapa inyakeritem chiochtsü

**Guwahati, March 2 (Agencies):** Paresh Baruah-ia aniba United Liberation Front of Axom (ULFA-I)-i asüng Quippo Oil and Gas Infrastructure Limited nung mapa inyaker nisung ana chiochtsü ta osang angazükter.

New Delhi nung amenoka aliba Quippo Oil and Gas Infrastructure Limited-i mapa inyaker ana chiochkdaksütsü atema Assamese engineer tem asoshi mapa 5,000 adoktsütsü nangzük ta osang ajanga ashi.

ULFA-I aser totzü company tsüngda tiyongtsüi ia jembir Kaushik Phukan-ia iba osang metetdaksü.

Arunachal Pradesh kübok

Changlang in district nungi ULFA (I) aser NSCN (K) telungpurtemi Pranab Kumar Gogoi aser Ram Kumar na pur ao.

Tena chiochtsü atema ULFA (I)-i Rs. 20 crore meshi saka state sorkari ibaji magizükba ajanga ULFA (I)-i tena tepsettsü telemteba agiogo ta osang metetdakja liasü.

Ajisüaka, ULFA (I)-i iba o meyipa agi aser sorkar dang 'Quippo' den jembishinütsü atema mapa inyaksü ayongzük.

"ULFA (I) ya nisung tepseter telok ka masü. Onoki nisung taküm magir. Onok ya nisung tepseteritem masü. Onok tsütsü nungi kishi lapokja lir. Mapang ano lir aser onoki jembishinütsü molunga lir.

Ajisüaka, Quippo ketdangpsürtemi onok den jembishinüra, ulua bilemi yimya agientsüla" ta Paresh Baruah-ia ashi.

Assam chief minister Sarbananda Sonowal, senior minister Himanta Biswa Sarma aser United Liberation Front of Asom (ULFA) general secretary Anup Chetia nungertemi totzü company nung mapa inyakeritem chiochtsü mepishiba sülen ULFA-I-ia iba osang metetdaksüogo.

Olemtepa aruba sülen tatem nung Quippo Oil and Gas Infrastructure Limited-ia Assam nung lanur 5,000 mapa nung aniochtsü ta nangzükba ULFA (I)-i molunga agizük.

## Global Naga Forum-i Myanmar nung atema aria bilemetsür

**Dimapur, March 2 (TYO):** Alima tesem balala nung Global Naga Forum züngsemtemi Myanmar nung atalokba atema tibelemtsü khuret abenba metetdaksüogo.

Myanmar nung mitkartemi democratic inyakyim agienba angudang temolung raksar aser jashir. Parnoki national election agiba madak tashiyim mapa inyaker aser political o public lennirtem tepuokdak yua lir. Tang police aser security forces-i public dak tashiyim mapang inyaker aser iba atema aria bilemetsür, ta Global Naga Forum, Oking-Kohima sangdong

ka nung ashi.

Nübertemi mitkar tashi anema timi lungkak aitba angudang onok ajungmesor. Myanmar linük kübok tesem balala nung nisungtemi alizüng ka atema longjemba angudang teimla mesamar, ta parnokisa ashi.

Democracy nung amanger nisungtemi tetetba Naga nung atema international forum ka ama onoki nübertem taginüba akhümtsübur. Nübertemi democracy ka tamendakdakji elections timi agiba lir ta ashiba nung onoki pusema nungiter aser

iba ama tensa tamajung ka nung Myanmar nung aliba Naga nung den külemi noktaker, ta Global Naga Forum-isa metetdaksüogo.

"Alima lennirtemi Myanmar nung democracy bener arutsü atema mapa inyaksü mepishir. Mitkartemi tai maketba civilian tem dak tashiyim mapa inyaker. Myanmar nungeri parnok shimteta sorkar aginür anungji UN Security Council-i iba tatalokba bushisingdangtsü aser aibelenertem merenshitsu imlar," ta Global Naga Forum-isa ashi.



## Hopta ana amungtsü aliba World Consumer Rights Day tenzükogo



Kohima Law College nung March 2, 2021 nü hopta ana atema World Consumer Rights Day tenzükba mapang Nagaland Voluntary Consumers' Organisation tir Kezhokhoto Savi den Kohima Law College indang final year students tem tangokba noksa nung angur.

**Dimapur, Metsüremi/March 02 (TYO):** Nagaland Voluntary Consumers' Organisation (NVCO) aser Kohima Law College lungjemer hopta ana amungtsü aliba 'World Consumer Rights Day' sentong March 2, 2021 nü Kohima Law College nung tenzükogo.

Plastic agi tzü-mopung menentsüba ajemdaktsütsü asoshi komasür awareness agütsütsü aser World Consumer Rights Day amungba ajanga nüburtem nem tzü-mopung wazüka ayutsü yimyatem angazükdaktsütsü asoshi sentong balaka agia liasü.

NVCO tir Kezhokhoto Savi ajanga "Tackling Plastic Pollution" omen nung ajemdaker hopta ana amungtsü aliba World Consumer Rights Day tenzüktsü, koba March 15 nung tembangtsü. Alima ajunga nung iba anogomung ya küm shia March 15 nü amunger.

Iba sentong nung Savi-i omen nung ajemdaker jembiba mapang, "Plastic ya asen takum nung anogoshi kanga nungdakba oset ka lir, saka asenoki amshiba aser yangluba plastic,

talisa khen amshiba plastic ya mazüokteti kuma asen ecosystem nung kongshia tzü-mopung nung timtem agütsür aser nisung temang nung timtem agütsür," ta ashi.

Plastic agi alima nenenba azioktsü ya aliba ajunga nung tebilemstü tulu lir aser iba atema amalitep aser alima ajungai shilem agiba nungdaker. Ajisüaka asenok senso tajung kaka ama plastic azioktsü, shisakaa amshitsü aser yanglutsü asoshi tongtipang shilem agitsüla, ta pai ashi.

2050 küm tashinung tzüyim nung angog dang nungi plastic timba alitsü ta asadanteta lir. Anogoshi plastic ton million 8 shi tzüyim tonga aor, küm shia plastic yangluba shilem 50 bo khen dang amshitsü akokba plastic lir, tang tashinung yanglua aliba plastic ya tesadang ka tesüba küm 15 tsungta yanglu, plastic agi yangluba oset shilem 40 packaging nung amshir aser itemji khen dang amshir indoker, ta pai ashi.

Savi-i consumer tem dang plastic agi tzü-mopung

menentsüba atema khuret tali abentsü ajungshi aser shishilempaba mapang tanaben amshitsü akokba juli amshitsü, tanaben tzü inoka amshiba bottle tem amshitsü ajungshia liasü.

Tashidak wara agi alima ajunga sünger aliba mapang khen dang amshitsü akokba plastic amshiba tali akum saka tangbo asenoki tzü-mopung asoshi khuret abentsüla, ta Savi-i ashi.

Europe, US aser South America nungi consumer shilem 74-i sustainable packaging nung sen tali indoktsü molunga lir, ta paisa ashi.

Iba anogomung sentong tenzükba sülen parnoki jenjang balala nung consumer rights, environment protection, human rights, state consumer helpline with toll free No.1800-345-3701, tackling plastic pollution, food safety, food security amala onüktem nung SOP tem amshia awareness agütsütsü.

Lanurtemi iba atema shilem tulu agitetsü, ta ajiteta parnoki arogo nung lanurtem nem temolung agütsütsü.

## COVID-19 Vaccination center tem metetdaktsüogo

**Dimapur, Metsüremi/March 02 (TYO):** State nung aliba nüburtemi COVID-19 mozü mela mela agitetsü mechi Department of Health &

Family Welfare ajanga sangdong ka nung March 04, 2021 nungi March 15, 2021 tashi COVID-19 Vaccination center ama amshitsü asoshi

Health Units tem shimteta sangdongogo.

Maneni health unit talila metetdaktsütsü, ta sangdong ajanga ashi.

### LIST OF COVID-19 VACCINATION CENTERS

Sl.No	District	Facility COVID Vaccination Center (CVC)
1	Dimapur	Govt. District Hospital, CHC Medziphema, Dhansiripar CHC, UPHC Ducan, UPHC Burma Camp
2	Kiphire Govt.	District Hospital, Pungro CHC
3	Kohima Govt.	District Hospital, CHC Chiephobozou, CHC viswema, CHC Tseminnyu, UPHC Potterlane, UPHC Seikhazou
4	Longleng	Govt. District Hospital
5	Mokokchung	Govt. District Hospital, Tuli CHC, Changtongya CHC, Mangkolemba CHC, UPHC Mokokchung.
6	Mon Govt.	District Hospital, Tobu CHC, Aboi CHC
7	Peren Govt.	District Hospital, Jaiukie CHC.
8	Phek Govt.	District Hospital, Chozuba CHC, Meluri CHC, Pfutsero CHC
9	Tuensang	Govt. District Hospital, Noklak CHC, Longkhim CHC, UPHC Tensang
10	Wokha Govt.	District Hospital, Sanis CHC, Bhandari CHC, UPHC Wokha.
11	Zunheboto	Govt. District Hospital, Aghunato CHC.

**Mozü agütsüba anogotem: Hombar, Mongulbar, Bodhbar aser Brehostibar.**

Mozü agitsüpurtem: January 1, 2021 tashinung arishi küm 60 junger alir tema senso ajak, January 1, 2021 tashinung danga tashidak agi menepa alir arishi küm 45 nungi 59 tsungta, health care aser frontline workers tem. Mozü agitsü temsüa alir senso ajungai pei sasa cowin.gov.in nung teniung züluoktsüla aser mozü agütsüba tesemtem nungi iba mozü ya agitsüla.

## Arishi küm 45 - 59 pur Comorbidity Certificate agizüktsü metetdaktsü

**Dimapur, Metsüremi/March 02 (TYO):** COVID-19 mozü agitsü asoshi January 1, 2021 anogo tashinung arishi küm 45 - 59 tsungta alir senso ajungai Registered Medical Practitioner nungi COMORBIDITY CERTIFICATE bener arutsüla.

Tashidak tejangja agüja aliba

**C O M O R B I D I T Y CERTIFICATE** < (ANNEXURE 1 (B) > ya tsinglanglen agüja aliba websites nungi download asütsü akok: 1.nagahealth.nagaland.gov.in (WHAT'S NEW and DOWNLOADS) 2.covid19.nagaland.gov.in

(ADVISORY/NOTIFICATION) Online ajanga cowin.gov.in nung self-registration upload asüba mapang registered medical practitioner nungi meyongnem agüja aliba copy ka upload asütsüla. Meyongnem agüja aliba hard copy ya mozü agütsüba tesemi bener arutsüla.

## PDSA pur ajungben senden jateper

**Kohima, Metsüremi/March 02 (TYO):** Red Cross Building, Kohima anasa aliba Ura Hotel nung March 06, 2021 anüngdang 12:00 ako nung Phek District Sports Association (PDSA) pur ajungben senden ka amentsü, ta sangdong ka

ajanga ashi. Iba dak sendakba nung PDSA tir Nezosa Tetseo-i advisor, area president aser PDSA kübok affiliate süa aliba association indang tir ajunga arua adentsü mepishia metetdaktsü.

## Nagaland nung World Engineering Day amungtsü

**Kohima, Metsüremi/March 02 (TYO):** Federation of Nagaland State Engineering Service Association (FONSESA) ajanga March 04, 2021 anepdang 11:00 ako nung Hotel Vivor, Kohima nung World Engineering Day amungtsü.

Iba sentong nung Minister, PWD (Housing & Mechanical), Tongpang Ozukum tesemdanger tongti asütsü aser FONSESA tir Er. Moa Aier-i tarur pela agizükba o jembitsü. Iba anogo nungsa FONSESA indang nükla kakat sayatsü.

## State kübok tesem asem nung kitsük-kirong lendong atalok



**Dimapur, Metsüremi/March 02 (TYO):** KBCA Komking, Noklak nung kitsük-kirong lendong adoka lir ta March 1, 2021 nikongdang 2:00 ako meta osang aruba sülen Fire Station Tuensang nung amenoka aliba Fire Personnel tem mi ya remseptsü asoshi ao. Fire Tenders den hadir tabensa bener mapang shidak nung oa mi remsepteta liasü. Fire team ajanga iba mi remseptsü asoshi mapang ghonda ka ser minute 30 agia liasü. Tang tashi iba mi tenzükba kuli monguteter aser iba lendong nung asü-amar shinga meliasü. Item mibener ya Duty Commander ASI Mziegwangteing-i anir oa liasü.

Maneni School of Agricultural Science and Rural Development, Nagaland University, Medziphema, Dimapur nung kitsük-kirong lendong adoka lir, ta March 01, 2021 nikongdang 1:48 ako nung angashiba sülen iba mi remseptsü asoshi Fire Station, Chümoukedima nungi Fire & Emergency Services team nungi oa liasü.

Iba kitsük-kirong lendong

nung süngjang aser aonsotsü kar rongdoka liasü. Iba lendong atalokba kuli monguteter aser iba lendong nung asü-amar shinga meliasü. Mapang shidak nung mibener aruba ajanga mi tali kaoloka aoba nungi nokdangtet.

Mibenertem ya Duty Commander SI Kenyuyhun Kent lenisüba kübok liasü aser parnoki ghonda asem agia mi ya remseptet.

March 1, 2021 nikongdang 4:40 ako meta Meriema Village, Below New High Court, Kohima nung kitsük-kirong lendong adoka lir ta osang ka aruba sülen Fire Station, Kohima (North) nungi Fire & Emergency Services team ka mi ya remsepi ao.

Hadir tabensa bener mapang shidak nung oa mi remsepteta lendong tuluba ataloktsü aliba nungi kumzüktsü liasü. Fire Team ajanga ghonda ana jungnüa agia iba mi ya remseptet aser tang tashi iba mi adokba kuli monguteter. Iba lendong nung asü-amaba meliasü aser response team ya Duty Commander SI Inaka lenisüba kübok oa liasü.

## India nüjiso ngur küm 75 ajungba anogomung atema committee shim

**Dimapur, Metsüremi/March 02 (TYO):** India nung nüjiso ngur küm 75 ajungba benjongmung state nung tajungtiba nung amungtsü asoshi March 12, 2021 (Azadi Ka Amrut Mahotsav tenzükba anogo) nungi sentong balala agitsü aser omen jangjateta sentong agitsü tesem shimtsü asoshi Chief Secretary, Nagaland tekolakba sür committee ka tentetogo.

Iba committee nung züngsem yamai alitsü:

1. DGP, Nagaland.
2. Principal Secretary, Home.
3. Commissioner, Nagaland.
4. Commissioner & Secretary, IPR.
5. Commissioner & Secretary,

6. Art & Culture - Member Secretary.
7. Commissioner & Secretary, Youth Resources & sports.
8. Special Secretary, School Education.
9. Secretary, Higher & Technical Education.
10. Principal Director, School Education.
11. Director Higher Education.
12. Director, Youth Resources & Sports.
13. Director, IPR.

Iba committee indang mezüng senden ya Chief Secretary, Nagaland indang Conference Hall nung March 3, 2021 nikongdang 3:00 ako nung amentsü jatepa lir.



## Priyanka Gandhi-i Assam nung "Five Guarantee" campaign tenzüksüogö



March 2, 2021 nü Priyanka Gandhi-i Biswanath district kübok Sadharu Tea Estate semdangdang agiba noksa angur.

**Tezpur, March 2 (Agencies):** Congress General Secretary Priyanka Gandhi-i 2021 Assam Assembly Elections atema 'Five Guarantee' campaign tenzüksüogö.

Taküm election atema Congress-i "Guarantees" pungu inyaksü nangzüker aser ibaji tanü Tezpur nung election nüboyimba sentong tulu ka nung Priyanka-i metetdaksü.

Item onük ya CAA agientsüba, sorkar mapa lakh 5 adoktsütsü, süngolu nung mapa inyaker anogoshi taa Rs. 365 kümtsütsü, kilen shia electricity units 200 angati agütsütsü aser kidang dang alir kinungtsü ajak nem ita shia Rs. 2,000 agütsütsü lir.

"Iba election ya temolung alemba indang lir. Assam nung dang küm pungu tejakdang party kati mapa agütsütsü ta nangzüker saka CAA ang agütsü. Congress party-i tazüngla tenangzükbatem magir saka guarantee pungu agütsütü nangzüker, ta Priyanka-i ashi.

BJP-i 'Joi Aai Axom' yimiyim ajembangtsü meranger. Parnok indang 'hum do humare do' yimiyim ajanga ibaji sayur, ta laisa ashi.

BJP-i linük nung shishilembar takartiba ana den tesentaktep tajung yua lir. Parnoki takar shishilembar nem oil fields aser airports yokdokogo" ta Priyanka-isa metetdaksü.

Assam nungeri maitsü aser ali kümzüka ayutsü atema rarar, ta laisa shisem.

Iba sentong nung Assam Pradesh Congress Committee president Ripun Bora-i "Five Guarantees" indang rasa ashidang "Congress-i 'Asom Basaon Ahok' Yatra ajanga nübortemi tebilemstü tulutiba ajurubatem jangjaogo aser tang onoki public dang item asoshi lenmang sayur" ta ashi.

Congress Campaign Committee tanishir Pradyut

Bordoloi-i guarantee mezüngbuba indang ashidang "Assam assembly nung ozüing ka yanglur CAA agientsü" ta metetdaksü.

"May 2 nü Congress-i election nung takok anguba sülen Assam assembly nung Assam nung CAA mapa küma meinyaksü atema ozüing ka yanglutsü. Onoki iba ozüing yanglutsü atema lawyers dang asüngdangogo" ta pai ashi.

Lok Sabha MP aser Manifesto Committee Chairperson Gaurav Gogoi-ia sorkar mapa lakh 5 agütsütsü indang ashidang "BJP-i sorkar mapa lakh 25 agütsütsü ta tiyazü nangzüker saka Congress-ibo lakh 5 dang agütsütsü nangzüker" ta metetdaksü.

"Onoki state budget repringogo aser economists den asüngdangtepogo. Idangji onoki küm pungu nung sorkar mapa lakh 5 dang agütsütetsü akok ta bushitetogo. Iba ya election nung tiyazü nangzüker ka masü saka guarantee ka lir" ta Gogoi-isa ashi.

Assam nung Congress sorkari private-sector nung Assamese nung nem mapa wazüksütsü aser iba ajanga private-sector mapa lakh 25 adokdaksütsü, ta paisa shisem.

Leader of the Opposition Debabrata Saikia-ia "Congress sorkar akümba sülen anogo 30 tsüingda süngolu nung mapa inyaker nem anogoshi taa Rs 365 kümtsütsü" ta metetdaksü.

Iba guarantee ya Rahul Gandhi-i taoba mapang nangzüker, ta paisa ashi.

"Onoki Assam nung süngolu maparen jungjunga shisadangogo. Kerala nung süngolu nung mapa inyakerteri anogoshia Rs 380 aazüker süra, Assam nung anogoshia Rs 365 agütsütetsü. Süngolu kiburtemi iba ya melamela inyaktetsü aser ibaji onoki anogo 30 tsüingda inyaksütsü" ta Debabrata

Saikia-isa metetdaksü.

Kechisarena nung jenjang atuba ajanga nübortemi tetsükdaksü ajurur anungji Congress-i kilen shia electricity unit 200 angati agütsütsü, ta Publicity Committee Chairman Rakibul Hussain-ia ashi.

"Unit 200 ji electricity bill nung Rs 1,400 shi ka adoktsü. Iba ajanga Assam nung nisung timba ka indang electricity bill tazüngla akümtsü" ta paisa ashi.

Barak Valley nungi Congress lennir Sushmita Devi-ia mapa meinyakba kinungtsü shia nem ita nung Rs 2,000 agütsütsü indang metetdaksü.

"Tetsürtemi kidang mapa inyakba loktii memeter. Tetsürtemi anogo piyong joka nung, ki merükmejuba nung, tanur anepaluba nung mapang endoker. Parnok nem ita shia Rs 2,000 agütsüba ajanga ki tajungba anepalutsü ta onoki bilemer" ta lai ashi.

Congress teka nung temeyong pungu lir aser temeyong shiai guarantee ka agütsür, ta Congress General Secretary in-charge of Assam, Jitendra Singh-ia metetdaksü.

"Iba election nung nübortemi Congress kanga pusemer. Iba jagi party aikati Congress-i aniba Mahajot nung denogo. Assam politics nung tongti shilem agir Bodoland People's Front (BPF)-ia onok den denogo, kechiyong parnoki takoker jangjaogo" ta Jitendra Singh-isa ashi.

Congress-i Assam nung taruba ita ka nüboyimbang vote enoktsür shia dang "Five Guarantees" metetdaksütsü.

Mongulbarnü Priyanka Gandhi-i Biswanath district kübok Sadharu Tea Estate semdang aser idakji mapa inyakerteri den ajurutepa sensaksem.

Priyanka-i süngolu nung mapa inyaker ka kidang chiyung.

## Mizoram Congress-i arogotem aser NGOs dang tatok meshir

**Aizawl, March 2 (Agencies):** Congress-i 2008 aser 2018 tsüingda Mizoram nung kümsük anaben sorkar yimsü asüding aibelenbatem atema taoba Mizoram health minister aser Congress lennir Lal Thanzara-i tatok meshiogo.

Mizoram kübok Lunglei jila nung osangbener senden ka nung Lal Thanzara den taoba finance minister Lalsawta aser Congress lennir aika aden.

Lal Thanzara ya taoba Chief Minister aser Congress president Lal Thanawla tenu lir.

2018 assembly election nung Congress-i tamakok angubaji wine shops lapokba ajanga liasü, ta Lal Thanzara-i ashi.

"Arogotem aser NGO tem anema onoki wine shops lapok aser alcohol permits agütsü. Iba ajanga onoki tamakok angu. 2023 küm assembly election nung takok ngura onoki liquor permits magütsütsü nangzüker. Onoki aibelenba atema arogotem aser NGOs dang tatok meshir" ta pai ashi.

Congress party-i küm 10

sorkar ketdangsidang New Land Use Policy (NLUP) takok ngua tenzük saka election nungbo tamakok angu, ta Thanzara-isa shisem.

Congress-i taoba mapang aibelenba nungi angazükogo aser sorkar akümtsü atema onok melenshir, ta paisa metetdaksü.

Iba osangbener senden nung Lalsawta-ia chief minister aser Mizo National Front (MNF) president Zoramthanga aitsü.

Chief minister-i jembiba aser nangzüker ama meinyaker, ta pai ashi.

MNF sorkari senotsü tim mesü amshir. Taoba Congress sorkari Mizoram state indang senotsü tia tajungba kümdaksütsü atema küm 2 kanga meranga inyaker aser iba jagi MNF sorkar teyari tulu angu, ta Lalsawta-isa metetdaksü.

Iba sentong nung Lal Thanzara aser Lalsawta na den taoba Rajya Sabha MP Ronald Sapa Tlau, taoba Congress MLA Joseph Lalhlumipua aser tanga lennirtem aden.

## AR-i Moreh nung UKLF züngsem ka apu

**Imphal, March 2 (Agencies):** Assam Rifles sepaitemi Manipur Police den külemi mita aodang United Kuki Liberation Front (UKLF) züngsem ka apu.

Moreh kübok Canan Veng tesem nung parnoki Thangminlal Mate (25) apu. Sepaitemi Molphei yimtsüing

nung ki ka mita aodang pa apu.

Pa ket nungi AK rifle ka, AK rifle magazines 3, AK rifle injang 184 rounds, KECHADO mobile phone ka, magazine pouch ka aser rifle sling ka ngutetogo. Sepaitemi UKLF züngsemji Moreh Police ket nung agütsü.



Meghalaya kübok Garo Hills district tem nung Hombar nungi SSA tesayurtemi class-i moi lungkak ait tenzükogo. All Garo Hills SSA School Teachers' Association-i Project Approval Board (PAB) ama ita 8 indang arrear salary meshia hopta ka lungkak aittsü ayongzüka agir. (Tura, March 2)

**GOVERNMENT OF NAGALAND  
OFFICE OF THE  
GENERAL MANAGER : DISTRICT INDUSTRIES CENTRE  
KOHIMA ::: NAGALAND**

NO.DIC/K/TRG-01/2004/

Dated Kma, the th March 2021.

### ADVERTISEMENT

NO.DIC/K/TRG-01/2004: Applications in plain paper along with bio-data and the attested copies of requisite documents are hereby invited from the intending candidates having a minimum educational qualification of (a) for forward tribe Graduate and above (b) for backward tribe PU passed and above to undergo 12 (Twelve) months training course at District Industries Centre, Kohima for the session 2021-2022 in the following trade; STENOGRAPHY.

The last date for receive of application is 26-03-2021. Interview will be conducted on 31-03-2021 at 10:30 AM in the office chamber of General Manager, DIC, Kohima. Candidates should bring Educational/Testimonial Certificates in original at the time of interview.

Neither separate calling letter nor TA/DA will be given.

Selected candidates will be awarded a monthly stipend as admissible. The programme is purely for self-employment and no job guarantee assured on completion of the training.

The training period will commence effectively from 5th April 2021.

(A. Temjen Jamir)

General Manager,

District Industries Centre, Kohima.

Issued by DIPR





## TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 03, 2021

### COVID MOZÜ AGITSÜ AJUNGSHIR

**A** jungbena alima tesem ka nung khen, ka nung khen ta yaküm 2020 küm Covid-19 tashidak wara agi menepa arudang nisung ajaki Covid mozü yanglutetsü yongya aser tesem kar nungbo shitakba Covid mozübo masü ser nung sen aika agi raktepa alitepba osanga liasü. Aji oda, Covid wara prokshia aoba tialong nung asenok shinga pei kidang nungi mayazükdaktsü ita dak tali mongdaktsüba anogotem to bilemdangra aonung pongmang amai bilemer. Ajsüaka, iba to asangsang nung asen putu nung ajuruba alima tensa tamajungtiba rongnung ka asütsü. Iba mapang to asenok ajak asoshi sarasademba mapang tajung ka liasü. Asenoki asen taküm aser kibong Covid-19 tashidak nungi kümzüka alitsü asoshi dang masü saka alima nung doctor aser nurse-tem asoshi sarasademtsü aser medical scientist-tem nem Covid-19 mozü bushitetsüsa shisatsü agüjang ta sarasademtsü. Aji oda, tanü asenoki sarasadema yongyaa ataba ama medical scientist-temi Covid-19 nokdangtsüba mozü ngutetogo. Item rongnungji, asenok tia ajung, alima nung Covid-19 mozü tajungtiba asütsüsa India nung yangluteta lir. Item mozütemji India nung asoshi dang masü saka alima ajunga asoshi yanglur. Iba jagi India dang alimai "World Pharmacy" ta ajar. Ajsüaka, ano Covid-19 mozü agitsü ajungshiteptsü melen olulu tapu balala adoka Covid-19 mozü agitsü arendaka bilemetsüsa jembibaji alima nung alir ajak asoshi tia majung asütsü. Iba jagi, ashiko, mozü kidang inyakertema karbo tsübuba agi Covid-19 mozü agitsü asoshi parnok nem tama maangka agütsüaka magii alitsüa akok. Ibaji pei asoshi dang masü saka tangar asoshia khuret (risk) tuluka bener arutsür asütsü. Covid yabo menatepa aoba tashidak asünungji, asenok memenatsü atema kisung kumdang masü saka asen dak mena nungbo kidang kinunger aser mapa inyakdak külem inyakertem ajak dak menatepa aotsüba tashidak asüba agi talila kumdangtsüsa adoker. Ibayongji, ashiko Covid mozü agiba jagi karbo khenbo temang metaa timtem ajurutsüa akok saka iba jagi asen dang masü saka nisung aika taküm kümzüker ta angatetdi. Aji oda, January nung mezüng Covid mozü ya mozü kidang inyakertem nem agütsür külen, yakanü nungi arishi küm 60 ser tema pur den ano küm 45 nungi temapurtem rongnung shirangertem nem Covid-19 mozü mezüngren (1st dose) agütsüba sentong tenzüka anogo nung, linük nung ato kilonser, Narendra Modi aser tadong tir Venkaiah Naidu nati anir mozü agi tenzüka jagi olulu jembiba ajak to nembanga yutsüogo. Aji oda, ano külen state-tem kar nung chief minister-i anir yimsüsürtemi Covid-19 mozü agia sayubaji Covid-19 tongpang akoktsü tetenzüker asütsü. Asenoki aiben asenok dak mekongshira zübazübaa bilemer, iba jagi asenok aika taküm nung yimra agi tashidak tulu kumdaktsür aser aneptsüba tashidak agi manepettsüba tashidak kumdaktsür. Alima nung olulu tapu tapu jembitsüa akok, saka asenoki angatettsüba mapa kaji medical scientist-temi senotsü tajangzük aser tenüng agitsü atema taila mozü yanglur alima nem magütsütsü. Ibaji mozü agirtem dang nungibo parnok asoshiang lendong tuluba asütsü. Aji oda, koba mozü südirsüaka jungjunga tendanger külenang junger ta kuli sütet nung dang nisung nem agütsütsü melar. Iba mozü agitepba maparen nung, ajak dang osang tajungtibaji, tang arishi küm 60 ser temaba purtem nem Covid mozü agütsü tenzüka mezüng anogo nung, Hyderabad nung arishi küm 100 tain ka kecha timtem mali Covid-19 mozüjem agibaji asütsü. Nagaland nunga yimsüsürtemi anir nisung taintem aika mozü ki bushia oagi Covid-19 mozü agi tenzüko. Iba mozüjem ya nisung shia anabenren agitsü asünungji, mezüng agiba anogo sülen anogo 28 lir külen tanabuba aser tesüsabaren agitsü. Tang tashi nung Nagaland nunga mozü kidang inyakertem rongnung Covid-19 mozü agirtem shinga daka iba mozü agi mapetba osangbo mangashi. Joko, asenok rongnunga Covid-19 mozü tsübua alitsüba masü saka Covid-19 agi atongang tsübua nisung ajaki, tang angati angudang ya, iba mozü ya agitsüla.

## OLEMSABANG

### HORNBILL FESTIVAL - SHIBA AJANGZÜKER?

~ Wati Longchar (Serampore)

(Yashi adok nungi...)

Tanabuba nung, Tsüngremi taküm ajak poktetdaktsü. Tobur tajung lima aser yangji alibatemi Tsüngrem mulungjang sayur. Tsüngrem tashi ajanga anüng-ali taküm lidaktsür. Tsüngremi yanglu aser Pa item ajak madak kibur asü nungji, nai aser ni sen arishia itemji mashimashi raksatsütsü makok. "Alima aser yangji aliba, alima aser yangji alirtem KIBUBA meyong lir. Kechiaser pai aji tzyüim manung, aser ayongtem manung yanglu" (T. Ken 24:1-2). Meimchir ajak nem Tsüngremi yanglubatem timi achaayangtsü khuret aser temeima asen nungdak yari agitsü moatsü, saka kibur küma raksatsütsü, tayoktsü oset-ts?set ka ama amshitsü magütsü. Tsüngremi yangluba ali, tzu aser mopung ajanga taküm ajak lidaktsür anungji sen tajangzük asoshi Tsüngremi yanglubatem mapayui raksatsübaji lendong ta angateta Jubilee amungtsü Tsüngremi ozüng agütsü. Ali, shiruru aser alar nem anisüngzük agüjang ta ashiba tetezü, meimchir taginüba, shi jangratem bushiba tatakzük ka dang alitsü akhanger. Saka tanü takar ishikati dang, mesüra takar lima nung company kibur ishikati dang Tsüngremi yangluba alima aser yangji aliba rongsen bendenadokba ajanga nübur aika alar tia nung yuja lir. Iba yongji Tsüngremi "teyangluba lima ajonga tang tashi külemi timtem tekangshi nung anünger ta asenoki metet" (Rom 8:22). Tsüngremi yanglubatem timi achaayangtsübaji meimchir nem khuret agüja lir. Tourism terenlok mechi sensaker ket nungi Tsüngremi moatsüba teyanglubatem rakzüksü makok.

Anungji tourism industry ajanga takari Tsüngremi yanglubatem taochi makai raksaja, nübur madak tashiyim amshira iba anema ainakar ola adoktsü akhanger. Hornbill festival ajanga shiba aser shirnok tajangzük angur? Naga nung ajonga tajangzük angur asü masü? Yimtaklir tajangzükba lir mali? Kobala tajangzük küm 20 tsüngda nungi ngua ali? Aener shirnoki asen lima semdangern parnok koma anebalur? aser parnok dang asen sobaliba koma sayur? Hornbill festival tenüng nung Kohima aser Dimapur dang renloker asü, tanga district nunga kasaji terenlok mapa odagi? Temesepba, achi-ajem mazüokba, shi memerük tali adokdaktsür asü? Yi mayoktsü nokdangba agi asü, hornbill festival ajanga teraksa teimba bener arutsü? Sen mechi asen sobaliba akhüm metsübui amshia ali asü? Arogotemi, ABAM aser NBCCI hornbill festival ajanga tajangzük aser tesaksa bushidanga lir asü mali? Shisadangi.

#### Teyanglushitsü mapa kar

Temalen shisemba ama, commercial tourism industry asen rongnung alitsü. Ashiko tiemba züina aotsü shibai metet. Nagaland nung tanga industry mali, nungji tarutsü nung iba industry dak metaloker Naga nung aika alitsüsa akümtsü. Nübur sensaker anungji parnoki pei temang, sobaliba aser Tsüngremi yanglubatem ayoktsü, takari ishikati züp ta azüoka ayutsü, aser takar aser Government tajangzük angutsü ta ajiteta tourism renlokdaktsütsü merangtsü. O tajung jembia, bangtak yimsüsüri ashitsü, iba industry tashi ita kumdaktsüba ajanga alima nübur balala rongnung yimchiyimjung, tangatetep, amalitep maparen bener arutsütsü lemanng aika lir; aser meimchir lokti balala rongnung tesendaktep tajungba bener arutsütsü ta ashitsü. Saka ya metetdi: Sen aser tajangzük bushiba industry ka asü nungji, mekumdangra teraksa aika bener arutsütsü ana nung dang lir. Iba industry asen den alitsü asü nungji koda tajungba aser lokti ajak ajangzüksüsa, talisa sensakertem ajangzükdaktsütsü, koma yanglushi nung ajungtsü iba nükjidong nung nüburtemi ola adoktsütsüla. Tebilemdangtsü kar:

- Takar kar, kin ka-ana dang masü, saka nübur ajak tajangzük asa-lentong yanglutsüla. Talisa sensaker koda sür ajangzükdaktsütsü, taliba jenjang tajungba kumdaktsütsü ta asüba maparen ajungmesotsüla aser teyari agütsütsüla
- Terenlok maparen, tourist aruba tesem, tat. agi, Kohima, Dimapur dang masü, ajak liromedema tejakleni renloka odaktsütsü mapa inyaktsüla
- Lisopur sobaliba tajungtem sayutsü, akhümtsübua amshitsü aser wakzüka ayutsü sentong asütsüla. Asen sobaliba ajanga alima rangben dang yimjung aser tesünep bener arutsür iba wain-shin maparen angazükdaktsütsüla.
- Tourism terenlok mapa balala ajanga lisopur aluyimtsü makai ali, arem, ayong, awatsüng, tenem balala governmenti tashiyim agi magitsüla.
- Tourist guide tajung shima shi jangratem bushia jajaba pur dang lokti taküm nung teraksa adokdaktsüba maparen meinyaktsü ajungshitsüla aser sayutsüla. Temulung melenshir tangazükba tasen nung pei lima meyipa aotsüsa asa-lentong lisopuri inyaktsüla.
- Tenem nung dang masü, saka tenem tsünglen (foot hill) yim küma, aluyimba mapa balala tenzütsüla. Kisama nung hornbill anogo 10 amongba amai dang masü, saka küm piyong arua reprangnüsüsa tesem balala nung ola-angla mapa sayuba, chiyungtsü tapu tapu yangluba, sobaliba dak sendakba sayu, art balala, nara tsüki, süngjang lu, süngdong tapu balala, ozü amongdak, shiruru balala, enrivornment kümzüka ayuba atsü, ibala mesükba aika yanglutet. Rongsen dang arishia masü, shisatsü angazükdak tourist tesem tajungtiba lima ka südaktsütsü mapadong balala Government, arogo, yimtsüng shiai inyaktsüla
- Shi jangratem bushia senzür kisung dang masü, saka shisashiba tasen bushir, sai-sapong, yimtsüng taküm aser libaliro angazükdak, aser tanela asüngsahiba tourism tenzütsü ajungshitsüla

Aener anir senzürtem nem training tajung, tat. agi. sobaliba, otsü, ola-angla tetezü balala aser koda akhümtsübua amshitsü, ibala sayutsü asoshi lanurtem mapang shia training tajung agütsütsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**





Dimapur Ao Baptist Arogo kubok Merali Fellowship nung 2020 kum Sunday school nung graduate asurtem, Covid-19 timtem aliba agi graduation sentong takum 2021 kum March 02 nu agiba mapang agiba noksa ka yangi angur.

### Jharkhand nung tribal yimsu amangertemi Pastor ka dak azuk

**Hyderabad, March 01 (Agencies):** Jharkhand nung Latehar distarict kubok yimsung ka nung tribal yimsu amangertemi pastor, Lakshman Oraon lisu agi alener ghonda ka dak tema azuk.

Osangbener den jembidang pastor Oraon-i, "Ni masaten mesura majep. Ku dak azukyonga ni Tsungrem nem dang tenungsang agutsu aser Pai (Yisu) Kangki nung ni asoshi takum tenla agutsuba dang bilemteta liasu," ta metetdaksu.

Latehar district kubok Jungur yimdak yimsusurtemi January 24 nu pastor den Khristan kar jaoka liasu, aser senden nungji Khristantem dang tribal tsungremtem kulemkuja atema tenla agujang ta ashi. Ajisuaaka pastor-i parnoki akhangba ama sen magutsusu, ta ashiba sulen pa teka lisu agi alener ali nung mejangdaksuba sulen pa dak mapang talangka azuk.

"Parnoki ni lisu agi alenba sulen ku dak aiben metsu. Ajisuaaka Kibubai ku nem Mathi 5:11-12 tekong bilemtetdaksu. Iba lai ajanga ni tashi tasen angu, aser parnoki ku dak azukyonga ni mejashii liasu," ta

Tamalena pastor-i yimdaklirtem dang tribal tsungremtem kulemsu atema Khristantemi tenla magutsusu ta shir liasu.

Pastor Oraon-i ashiba agi pai yimdaklirtem dang, "Kechiba ni sen agutsusu, kechiyong ni tribal yimsu mamanger. Ni kulemkuja aser puja atema sen magutsusu. Ni meranga aaba sen kechiba ni mamangba tsungremtem dak indoktsu?," ta ashi.

Parnoki pastor Oraon dang, ner netsu-nebou nungertem tribal yimsu putirtem liasu, ajisuaaka nai bendangertem yimsu agizuk, ta shia yimdak nungi Khristan ajak mindoktsu ta amokmerena liasu.

Parnoki pastor dak azukba mapang nung Khristantem dang iba tatalokba noksa metangoktsu, video metangoktsu mesura police nem osang metetdaksutsula, ta amokmerena liasu.

Khristantemi parnok yimdak nungi mindok nungbo, ta tsubua Alliance Defending Freedom India nung Jharkhand coordinator dang iba osangji metetdakja liasu.

Pastor-i, "Onoki Manika

police station nung Station House Officer (SHO) aser district collector nem temepishiba shidi aguja liasu. SHO-i telok anaprongla police station-i ajaba sulen onok dang yimdaklirtem anema ken mebenoktsu, aser yimdaklirtemia onok yimdak nungi memindoktsu atema nangzudakja liasu," ta ashi.

"Police-isa onok dang timtem adokra onok nem phone ajanga metetdakjang ta nangzuk," ta pastor-i ashi.

Pastor Oraon-i ashiba agi, 2011 kum Khristan kati pa den Yisu Khrista indang lemsatepa liasu, aser idangyongjisa pai Khrista agizuk aser pa kinungtsuia Khrista agizuka liasu.

"Iba mapang nungjagi kiyongertemi onok takum nung temelenshi tuluji reprangteta liasu. Khrista agizukba mapang nungi onok dak temenen tanela maliasu. Onoki kibong ka ama Tenla kidangi ao aser kidang-a tenungsang ken aten. Ibaji nuburtem atema langka tasen liasu, anungji parnoki onok dang Khrista osangtajung parnok den lemsatepang ta mepishi. Tanibo ozu Arogo nung zungsem 35 tashi lir," ta paisa ashi.

### Khristan lenirtemi UP nung anti-conversion anema ola adoker

**New Delhi, March 02, 2021 (Agencies):** West Bengal aser Assam na nung Khristantem atema tongtibang anogotem nung assembly election agitsü, ibaji anema Khristantemi Election Commission dang April 1 nu election agitsü aliba anogoji melenshiang, ta mepishi saka election ketdangsertemi Khristantemi mepishibaji magizuk.

All India Catholic Union (AICU)-i shidi ka ajanga Election Commission dang Khristantem atema temeshi anogo 'Good Friday' jakdang April 1 nu election agitsü aliba anogoji melenshidaktsuner, ta mepishia liasu.

Ajisuaaka Deputy Election

Commissioner, Chandra Bhushan Kumar-i March 1 nu iba temepishibaji magizuk.

Osangbener den jembidang AICU national coordinator, A.C. Michael-i, "West Bengal aser Assam na nung election agitsü atema maparen ajak renemogo, anungji tang mapang nungbo anogo melenshitsüji tamakoktsu ta pai (election commissioner) shiogo," ta metetdaksu.

"Ajisuaaka tarutsu nungbo Meghalaya densema Khristan nutsung timba aliba state tem nung election agitsü anogotem shimdang kanga shisadanga shimtsu, ta pai onok dang nangzukogo," ta Michael-isa

metetdaksu.

Takum April 1 anogo (Brihostibar) ya Khristantem atema kanga tongtibang anogo ka lir; iba anogo nung Yisu Khristai Pa nutsungtem den tesusabuba süiba benjung monga liasu. Iba anogo nungji Yisu-i Pa nutsungtem tetsung shidoktsu ta Khristantemi amanger.

West Bengal nung assembly election March 27 nungi tenzuka shilem ti lemsar agitsü aser shilem anabubaji April 1 nu agitsü. Assam nunga legislative assembly election March 27 nungi shilem asem lemsar agitsü aser tanabuba shilemji April 1 nu agitsü.

### ANOGO ABEN TSÜNGREM DEN

#### Onoki shiba dangi aotsu?

Yohan 14:1-7

Simon Peteri pa dang langzu, "Kibuba, onoki shiba dangi aotsu?" Yohan 6:68.

Meimchir million aikati kasa tasungdangbaji asungdang- "onoki shiba dangi aotsu?" Aikati iba telangzubaji magutsuteteter! Parnoki bushir, asungdangteper, langkabo lir ta teyimla anema yimlar, kari mesura ajaki shidakba takum tetezu aser nukjidongji agutsusu. Yimya agi asen ajaki takum nung tongtipang tasungdangba asem telangzuba metetner: Ni shiba? Kechiba ni yangi alir? Ni koleni aor?

Aikati guru dangi ita, ita petinu takzur dangi aor. Takum tia metettsu asoshi sen jenti entoka lia ashir, arasentsur, shiner, pungmang takzur dangi aikati horoscope nung repranger aser telemtetba agir.

Peteri pa tasungdangba pa sasa tebur tenangzuka kati langzu: "Ne dak teti takum o lir." Yisuji asen takum. Pa shibai asenok asoshi pei takum agutsu pai asenok nem takum tasen ka agutsu, tatok anguba takum aser Pa den teti tatem maka takum alitsu takum. Asenoki Yisu aser Pa O dangi dang aotsu akok. Paji dang leman, ochi aser takum.

Kibuba Yisu, tepenja mapang aser yimjung mapang teti ku tamang ne dak lidakjang. Amen.

### Georgia nung pastor, Rev. Bryant coronavirus tashidak agi asu



Pastor Byrant Wardell Raines

tashidak agi shirangdar, ta metetdakja liasu.

February 12 nu Curtis-i, "Ni aser ozu kibongi nenok dang Bryant taneptsu angutsu atema maneni sarasademjang ta mepishir. Sarasadem nung tashi tulu lir ta asenoki metet aser asen Tsungrem ya taneptsur Tsungrem lir," ta mepishia metetdakja liasu.

Ajisuaaka pastor Hombarnu asuba sulen House of Hope Atlanta nung pastor, E. Dewey Smith aser Lundy Chapel Baptist Arogo nung pastor, Alexander Montel Gibson na densema Khristan lenir aikati mangyim jashi lemsatepogo.

Smith-i facebook post ka ajanga, "Ni melung kanga shiranger! Ni repranga lia pa inteta liasu. Pa lanuwa baseball asayaba ni nguogo! Ni pa tesayur liasu. Pa tebu asur, Pastor Curtis Raines ku tembar liasu! Tedi (Curtis) kuna school kulemi azung aser baseball kulemi asaya! Pa arrshi 44 dang liasu, aser temang junga liasu. Ni coronavirus tashidak sempar," ta metetdaksu.

2000 kum Georgia nung Byrant densema pastor asemi lenmang nung raratepba anema "Heal the Hood" mapatong tenzuka liasu.

**March 02, 2021:** Georgia kubok New Pilgrim Missionary Baptist Arogo nung pastor, Rev. Bryant Wardell Raines coronavirus tashidak agi asuba sulen tang Arogoi mangyimdar. Pastor Byrant ya arrshi kum 44 dang liasu.

Pastor Byrant asuba osang sangdonga General Missionary Baptist Convention nung Tir, Rev. Anthony Q. Corbett-i, tawa ang pastor Bryant ya Convention indang 6buba district nung Tir shima liasu, ta metetdaksu.

Corbett-i, "Nenok sarasadem nung Pa kinungtsu, Ilashia Raines den par kibong aser New Pilgrim Baptist Arogo nung zungsemtem bilemtetdaksuner," ta metetdaksu.

February ita tatemanglen pastor Byrant'er adianu, Curtis Raines-i Byrant coronavirus



**OLONG PAITEP # 5741**

1			2			3		4		
					5					
		6								
							7			
		8								
9										10
				11		12				
13										
14										
						15				

<b>TIPILEN</b>		<b>LANGTSÜNGLEN</b>	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

**OLONG PAITEP # 5740 TELANGZÜBA**

<b>TIPILEN :</b>	<b>LANGTSÜNGLEN :</b>
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong, 6. Lungkak,
10. Tsünpang, 11. Tesangwa,	7. Milak, 9. Zünga, 10. Temopu,
13. Aoksa, 15. Putir, 16. Yipru.	12. Walu, 14. Ali.



**ALOKBA KINUNGTSÜ WARAKLA MAPANG SHIA SARASADEMI AOR**

**Warakla** : Hai Nashi Pongchi...Ni onok tetsür telok kipok sarasademi aor ako...Na ak nem chi agujang... tzü chigo-jang... ak kiji perang-peranga shitokang...aser pongalashi tu nai yashi bener arua akaba ajakji alangjang... aser ni kidangi arudang ki mapa sorochiok ajak temer liangma noo...mapaji medemi kazüa alinungbo taonungbo... majungja ta metetdang noo...!!!

**Alokba** : Ayyaa...Tesangra-la... Nabo aji tera aibelena jembir ado... Kipoksem sarasademi aor ta masu...Onok ki ka nung senteper tangar nungsen jembia kazütsüba aor-a ta dang indang-indanga shiangma ...Ner telok ya nuktsü yima jeptepa sarasademtsü, aser-bo tangar nungsen jembia kazüteptsü ta asuba ya... asen yimer ajungai kanga ajeptoka bulua jembiba ya nenok-ia angashir sudi...!!! Anungji sarasadembaaji-bo tajung ako....saka nungsen jembiba yabo kangasa majung....iba yabo anentsüla adi.

Lilir : Kika Pongener.

**TANÜBO NAI LANGZÜANG**

Q. National Committee of Scheduled Castes ya Arrla \_\_\_\_ kübok constitutional body ka lir.

- A.337      B.338      C.339.      D.33

(Taruba adok nung onoki langzüsü)

YASHI ADOK TELANGZÜBA : 175

**AO OSHI ANGAZÜKDAK**

TANÜ ANGAZÜKTSÜBA OJANGTEM



Tir Yimyim

**Am<sup>1</sup>**  
(n.) Amtsük yanglutsü tanük küma menüngsar aliba (flour)  
• Mapok am ägi amtsük kanga junga yanglur.

**Am<sup>2</sup>**  
(n.) Temang den teka anaprongla asadangba piga (fathom, the distance from the middle fingertip of a large man holding his arms fully extended of one hand to the middle fingertip of the other hand)  
• Ozü kidang nungi tenla ki atongtsü am ter shi dang asütsü

**Am<sup>3</sup>**  
(v.) Anünüadang aser aniapongdang tebang tulu kaer tango sadokba (yawn)  
• Tenla kidang mener pa kanga am.

**NAI-A YA METETTER MA?**

**ALIMA NUNG JENJANG TULU AKETBA SAISAPONG TENTETTEM:**

- Liberty Media - \$13 billion  
Properties: Formula One, Atlanta Braves, Drone Racing League\*, Ball Arena\*
- Kroenke Sports & Entertainment- \$8.73 billion  
Properties: Los Angeles Rams, Arsenal, Denver Nuggets, Colorado Avalanche, Colorado Rapids, Altitude Sports & Entertainment, Los Angeles Gladiators, Los Angeles Guerrillas
- Jerry Jones - \$6.98 billion  
Properties: Dallas Cowboys, Legends\*, The Star, CompLexity Gaming
- Fenway Sports Group - \$6.6 billion  
Properties: Boston Red Sox, Liverpool, NESN, Roush Fenway Racing, Fenway Sports Management
- Yankee Global Enterprises - \$6.39 billion  
Properties: New York Yankees, Legends\*, YES Network\*, New York City FC\*, Scranton/Wilkes-Barre RailRiders
- Madison Square Garden Sports - \$6.25 billion  
Properties: New York Knicks, New York Rangers
- Kraft Family - \$5.3 billion  
Properties: New England Patriots, New England Revolution, UFC\*, Kraft Analytics Group, DraftKings\*, Skillz\*, Boston Uprising

(Maneni asüng adok nung...)

**SUDOKU # 5782**

3		7		1	2	5	6			
	6			5			8			
	1		3	6	7		4			
7	5	4				3				
			1	6						
			2	7	9	1				
9	2			5			7			
	7			2		6				
8	4									

**TELANGZÜBA # 5781**

1	6	2	3	5	4	9	8	7
8	4	3	2	9	7	5	1	6
5	7	9	1	8	6	3	4	2
6	3	5	9	4	8	7	2	1
7	9	1	6	2	3	8	5	4
4	2	8	5	7	1	6	9	3
9	1	7	4	3	5	2	6	8
3	5	4	8	6	2	1	7	9
2	8	6	7	1	9	4	3	5

**OJANG LUTEP # 5328**

- NKEO :
- JIDAEMBNG :
- ZÜNALIG :
- GJNUNI :
- KENGLRAOR :
- MBIJEANG :
- ÜRMESSA :
- DANKOGA :
- TEMLTAENI :
- RUTMASÜ :

**OJANG LUTEP TELANGZÜBA # 5327**

YIMKONGI MULUNGBA MAPAREN NUNG KIJAI TEKONG MERANGBAJI AMAJOK DANG AKÜMER

**TAN HOPTA ATEMA - KOMA SÜLA ?**

Q. Nagaland nung yi ayokba dokan odia lapokdaksü nunga koma süla?





All India Kisan Sangharsh Coordination Committee kübok aluyimer pusemertemi bike rally ka ayongzüka agiba mapang Odisha Assembly nung Center indang aluyimba ozüing agintsü khanga tezüluba nung takhangba ka agütsüi aoba noksa nung angur.

### 2030 tashi nungbo tzü lenmang 23 inyaksangshitsü: PM Modi

**New Delhi, Metsüremi/ March 2 (Agencies):** Linük nung port tongtibangtem indang tashi 2014 küm tone million 860 aliba tangbo million 1550 jungogo, ta ashiba den Ato Kilonser Narendra Modi Mongolbarnü, 2030 tashi nungbo tzü lenmang 23 inyaksangshi tenzütsü atema sorkar sentong lir, ta ashi.

"Tzü lenmang terenlok atema ozü sorkari senotsü intokdar, koba tang tashi nung ajangshia mali. Domestic tzü lenmangtem ya osettsüt belenshitsü atema kanga dalang aser iba ajanga tzü mopung kangabo mementsür," ta PM Modi-i Maritime India Summit 2021 lapokba sentong nung ashi.

"India tzüküm nung lighthouse 189 lir. Onoki lighthouse 78 den atonga aliba alitem nung tourism ajungkettsü atema sentong yanglua lir. Iba sentong nükjidong tongtibangtibaji tang aliba lighthouse tem aser iba temeket nung aliba tesem tem maritime tourism landmarks ama ajungkettsü atema lir," ta pai ashi.

Ato Kilonser-isa, 2014 küm tashi nung küm shia port tongtibangtem tashi tone million 870 shi aliba tang tone million 1550 shi kümogo, ta ashi.

"Tashi taitba akümiba ajanga asenok port tem nem teyari agütsüba dang masü saka rongsenketsü ajunga

ajungkettsür," ta pai ashi. "India sorkari linük nung rong yangluba aser yanglushiba ajungkettsü atema rangloker inyakdar. Linük nung rong yanglutsü ajungmesotsü atema onoki Indian Shipyard tem atema Shipbuilding Financial Assistance Policy agizükogo," ta pai ashi.

Sentong nung Ato Kilonser Narendra-i, Sagar Manthan-Mercantile Maritime Domain Awareness Centre aser maritime vision 2030 e-book sayatsü, koba taruba küm 10 tashi nungbo alima nung temaba jenjang nung aliba linüktem den jangyumedema Indian maritime industry ajungkettsü nükjidong nung sayaogo.

### BJP Lok Sabha züngsem Nand Kumar Singh Chauhan süogo

**New Delhi, Metsüremi/ March 2 (Agencies):** Khandwa, Madhya Pradesh nungi BJP Lok Sabha züngsem Nand Kumar Singh Chauhan, Gurugram nung mozüki ka nung süogo, ta par kinungertemi Mongolbarnü metetdaksü. Pa arishi küm 69 liasü.

MP term trok tashi bener alisang ya COVID-19 agi shiranga liasü aser pa temang kanga mejungi akümiba sülen taoba hopta Gurugram nung Medanta Hospital-i anir ao. Pa Hombar aonung süogo, ta source kati ashi. Pai kinungtsü, jabaso ka aser jala ana toktsür

iba lima nungi pilaogo, ta BJP otongdar kati ashi.

Pa den asüpila sentong Bodhbarnü Burhanpur district kübok Shahpur tesem nung agütsü, ta par jabaso Harshvardhan Chauhan-i ashi.

Chauhan mezüing 1978 küm Shahpur Municipal Council nung toktepa yimden yimsüsüba nung shilem agi tenzüik aser iba sülen pa Madhya Pradesh Assembly nung züngsem asütsü shim.

Pai 1985 küm nungi 1996 tashi MLA ama inyakogo. Pa 1996 küm mezüingbuba Lok Sabha züngsem asütsü shim aser iba sülen 1998, 1999, 2004,

2014 aser 2019 küm maneni shimshi.

Madhya Pradesh Chief Minister Shivraj Singh Chouhan-i, BJP lenir asüba osang angazüka mang ayimba lemsatopogo. Tweet ka ajanga CM-i, "Nandu Bhaiya-i state BJP tir ama party atema pa tajungtiba agütsüogo. Pa tasüming tanü par yimtsüing atongtsü. Ni pa nem akhüm tetushi agütsür," ta ashi. Kasa mapang nung taoba Union minister aser BJP lenir tejen Uma Bharti aser state Congress tekolakba Kamal Nath natia asükhu lemsatopogo.

### Haryana nung kaketshir 54 dak Covid-19 tashidak potet

**New Delhi, Metsüremi/ March 2 (Agencies):** Haryana kübok Karnal nung school ka nung kaketshir 50 tema dak coronavirus (Covid-19) tashidak potetogo, ta medical ketdangser kati ashiba ANI-i Mongolbarnü metetdaksü. "School hostel ka nung kaketshir 54 dak Covid-19 tashidak potetogo. Onok indang medical tema iba tesem tongaogo aser iba hostel ya tashidak agi menentsü aliba tesem ta sangdongogo," ta Karnal indang civil surgeon Yogesh Kumar Sharma-i ashi.

Haryana sorkari December ita class 9 nungi 12 tashi kaketshirtem school-i aotsü asoshi temelaba agütsü aser February 24 nü nungi tenzüka class 3 nungi 5 tashi lapoktsü temelaba agütsü. Sorkarisa Class 1 aser 2 atema-a Hombar nungi class tenzüiktsü telemetba agiogo.

Sorkar sangdong ka ajanga ashiba agi, class tem anepdang 10:00 ako nungi 1:30 tashi agütsü. Tsürapurtem dang par chirnurtem class-i yoktsü atema parnoki mulunga agizükba shiti school tekolak mesera class tesayur nem agütsütsü asoshi tetuyuba agütsüogo. Kasa mapang nung online ajanga dang

class aginertem atema temelaba agütsüogo, ta kasa sangdong ajanga metetdaksü.

School tem dang Covid-19 dak sendakba tetuyuba aser standard operating procedures (SOPs) sülen anidaksü atema tetuyuba agütsüogo. Kasa sangdong ajanga ashiba agi, school shia wing asem küma lemsatsüla. Wing ka nung kaketshir ka dak danga Covid-19 tashidak potetra iba wing anogo 10 atema shibangtsü aser school ajunga merektettsü. Wing ka dak tali nung tashidak keta alir potetra school ajunga anogo 10 atema shibangtsü.

Maneni Maharashtra nunga Hombar nung government office nung inyaker nisung 26 dak Covid-19 tashidak potetogo.

Hindustan Times sangdong ka ajanga, Vidhan Sabha-i ashiba agi, item nisungtem ya state budget matong tsüingda tashidak potetogo aser budget nung adentsü atema pass meshir liasü, ta metetdaksü .

Maharashtra nung taoba hoptatem nung anogo ka nung nisung 8000 tema dak tashidak potetogo aser iba ajanga ketdangsertemi night curfews aser tenokdangba balala agütsütsüsa aküm.



Mumbai nung COVID-19 tashidak kanga bulua potetba sülen CSMT railway station nung health worker temi passenger ka nung swab sample agizükba noksa nung angur.

### PM Modi tenüing asadangba atema Ghulam Nabi Azad aitsü

**Jammu, Metsüremi/March 2 (Agencies):** Congress party workers temi Mongolbarnü Jammu nung longkak aitba mapang party lenir tejen Ghulam Nabi Azad indang noksa rongtokja pa anema yimiyim ayim. State nung G-23 sentong agiba mapang Azad-i Ato Kilonser Narendra Modi tenüingsanga, pai pa taoba mapang süngo ayoker ka liasü ta alima matsüing dang mememshi metetdaksü ta ashi.

Azad dak rangloker Jammu and Kashmir Pradesh Congress Committee, General Secretary Shah Nawaz Choudhary-i, Congress-i pa temaba jenjang nung ajungketa aruogo saka tanü party pusemstü mapang nung

Azad-i Bharatiya Janata Party (BJP) den tamba ayimer, ta ashi.

"Congress-i pa nem aika agütsüogo. Congress-i pa Jammu and Kashmir indang chief minister-a kümdaktsüogo, ajisüaka party nem meyipa agütsütsü mapang nung pai par party pu-mesemi Congress tashmait kümdaktsür," ta Choudhary-i ashi.

Kasa mapang nung Jammu and Kashmir Pradesh Congress Committee, Vice President Aijaz Choudhary-i, "Ghulam Nabi Azad-i Ato Kilonser Narendra Modi tenüing asang, shibai asen statehood agin aser iba amala nisung yagi Congress tashmait kümdaktsür," ta ashi.

(Maneni tapak 10 nung...)



Kolkata nung mapa inyaker kati tata gari ka nung LPG cylinder belenokba noksa nung angur. February tetenzüklen nungi 14.2kg cylinder ka nung sen 125 talila kümogo.





Louisville, Metsüremi/March 02 : Paintsville, Kentucky kübok Euclid Avenue nung gari anentena alidak tzumetsung adoka aliba noksa ka yangi angur. Iba tesem nung tzunglu kanga sashia arua tzumetsung adokba sülen county aser yimti ajak senteper 13 nung state of emergency sangdonga lir.

### Southeast Asian minister tem Myanmar keno jembitsü renemer

**Naypyitaw, Metsüremi/ March 02 (Agencies):** Myanmar kidanger linüktem nungi foreign minister temi Myanmar mitkar lenirtem den yimtenren tsütsü yimjung lenmang bushitsü asoshi jembishinü tenzüksü renemshiba mapang iba linük nung mitkar tashi amshia sorkar atsüngdokba anema longkak aiter aridoktsü mechi Myanmar police temi Mongulbarnü injang khashishi.

February 1 nü mitkartemi Aung San Suu Kyi'er sorkar atsüngdokba sülen azüdokshi lendong tamajungtiba ataloker ananü lir video call ajanga jembishinütsü renemeshir.

Mitkartemi yimsü asüba anema yimyim ayimtsü asoshi Yangon yimti tesem balala nung longkak aiter noklang aika korang temerang semer jung amer police temi lenmang shibanga alidak adenshia liasü.

"Onok ajemreptsü merangra apoktsü. Onok dak kongshira onokia meyiper kongshitsü," ta yimti nung longkak aitertem ayimtena jajaba mapang police tem arua stun grenade khaloktsü

asir parnok aridok. Yangon nung nisung yiruba osang mali saka northwestern Kale jila nung nisung pezü yiru, kong longkak aitertemi police dak osettsüset mereploksüba mechi police temi injang khaloktsü.

Myanmar nung rongrongshirong adokba sülen longkak aiter nisung 21 takum samaogo. Kasa mapang police ka asü, ta mitkartemi ashir.

Küm 50 jungnüa Myanmar nung mitkartemi yimsü süa arur democracy tsütsüi mera agiba mapang mitkar tashi amshia sorkar atsüngdok aser iba yongji United States aser danga anüolen linüktemi aitsü aser tenokdangba agütsü, aser kasa mapang kidanger linüktem shisabulur.

Singapore Foreign Minister Vivian Balakrishnan-i ashiba agi, Association of Southeast Asian Nations (ASEAN) nung purtemi Mongulbarnü video call nung pokbaa jembitsü aser Myanmar mitkar teshimtet lenir dang azüdokshi agi aoksar ta ashitsü.

ASEAN ajanga Suu Kyi

asir mitkar lenirtem tsüngta jembishinütsü ajungshitsü, ta Balakrishnan-i Hombarnü menur television sensaksem ka nung ashir.

"Parnok jembishinü nüngdaker, aser asenoki parnok lungjemtsü atema yaritsü tim," ta pai ashir.

ASEAN telok nungya Myanmar, Singapore, Philippines, Indonesia, Thailand, Laos, Cambodia, Malaysia, Brunei aser Vietnam lir.

Suu Kyi'er teloki akokba November election nung ashikülak mapa inyak, ta ashishitep ken o benokba parnoki senzüka yutsü, ta mitkartemi sorkar atsüngdokba kuli agütsü.

Longkak aiter lenirtem aser ajungmesortem merenshitsu aser civil servant tem mapa inyaksü memolunger nema temerenshi agütsütsü, ta mitkar lenir Senior General Min Aung Hlaing-i ashir.

Min Aung Hlaing-i election tasen agia takoker nem tashi agütsütsü nangzük, saka tang tashi anogo lateta mali.

### Sri Lanka nung arasendang tetsür ka zükset

**Colombo, Metsüremi/ March 02 (Agencies):** Sri Lanka nung arishi küm teku tain tetsür ka dak nungi temenen tanüla aridoktsü asoshi arasendang süng agi la ya zükset.

La asüba dak sendakba nung tanutsüla tetsü aser arasenba mapa inyaker tetsür ka apu aser Hombarnü okadak nokdak, ta Sri Lanka police temi ashir.

Jala ya temenen tanüla agi apu ta la tetsüi amang, ta police-i ashir. Arasenba mapang tetsür la ya shisa rama aser mozü kidang asü.

Iba timtem ya linük yimtiba,

Colombo nungi kilometer 40 shi pilar Delgoda jila nung atalok, kong tetsür la yagi arasenba mapa inyaka liasü, ta osangtem ajanga ashir.

Tetsüi la dak nungi temenen tanüla aridok nung ajungtsü ta ashiba sülen tanutsüla tenütsü nung totzü mezütsü aser süng agi azük, ta police temi ashir.

Tanutsüla ajepba ola angashia kidangertemi anendaktsütsü merang, saka la mekumzükset, ta AFP news agency ajanga ashir.

Iba tesem nung arasenba mapa agi nisung yiruja mesüra asüba ya tang tasen masü, ta police temi ashir.

### Pur orr aliba Nigeria nung kaketshir 279 chiokogo

**Abuja, Metsüremi/March 2 (Agencies):** Nigeria anütoktiplen boarding school ka nungi tetsür 279 pur aoba ajak chiokogo aser parnok tang sorkar ki ka nung anepaludar, ta local governor-i AFP dang Mongolbarnü ashir.

Nigeria tir Muhammadu Buhari-i, tetsürtem pur oa aliba chiokba atema kanga pelaba lemsatepogo aser parnok pur aoertem nem temerenshi tesashi agütsütsü nangzükogo.

Ita asem majung tsüngda Nigeria nung pezüben tashi kaketshirtem purogo aser iba ajanga sorkar dang nüburtem kanga mepelar aser kasa mapang nung 2014 küm Chibok nung tetsür kaketshirtem noklang aika pur aoba bilemtetshidaktsü, koba ajanga alima ajanga anokshija liasü.

"Tetsürtem chiokogo, ta pelashishia sangdonger. Parnok tang sorkar ki ka tonga aruogo aser parnok ajak anema lir," ta Zamfara state Angh Dr. Bello Matawalle-i AFP dang ashir.

Ketdangsertemi, Hokolbarnü Jangebe yimtsung nung prangbong bener nisung noklang aika arua Government Girls Secondary School nungi tetsür 317 pur ao ta metetdakja liasü.

Ajisüaka Matawalle-i ashiba agi, tetsür 279 pur ao. "Parnok ajak tang onok den lir aser iba atema Allah nem tenüngsang agütsür," ta pai ashir.

AFP footage ka ajanga

kaketshirtem mini bus ka nung mener arur parnok ki kati tarensena aiba sayuogo.

Sorkar ketdangsertemi nisung pur aoertem den sensaksema aruogo.

Source kati ashiba agi, kaketshirtem chiokdaksütsü atema telungpurtem den tongteprateptsü asoshi bendang agütsür aliba telungpurtem den sendaktepa liasü.

Northwest aser central Nigeria nung kümtem tsüngda ozüng alema inyaksangshiba teloktemi sen meshitsü atema nisung pur aoba, tashiyim agi rakzükkrakdemba aser tetsür aika tashiyim agi raksatsüba maparen kanga bulua inyaksangshia arudar.

2016 küm iba tesemi Nigerian military yok aser 2019 küm item teloktem den yimjung asoshi tenangzüktepba ka yanglu ajisüaka parnoki maneni tashiyim maparen balala inyaka arudar.

December ita Tir Kankara Muhammadu Buhari-i Katsina semdanga aliba mapang state kübok Kankara nung school ka nungi tebur 300 dak tema pur ao. Katsina ya Tir indang state lir.

Mapang tatsüka lir teburtem ya chiok ajisüaka iba ajanga nüburtem kanga mepelai aküm aser Chibok nungi jihadists temi school tanur tetsür 276 pur aoba bilemtetshidaktsü.

(Maneni tapak 10 nung...)

## WORLD HEARING DAY

3<sup>RD</sup> MARCH, 2021


**Nokdangtsü aser azüoktsü**

- Tenarong nung timtem yakta anepaluadokang.
- TV, Radio, earphones, firecrackers, music ola tulu etc nungi nü tenarong kümzüka yuang.
- Tenarong yiruyibongtsü lendong paidokang. Iba jagi nü narong indang eardrum raksatsütsü akok.
- Tenarong nung tzü tamajung yidaktsüba paidokang aser nü narong nung totzü tenok mesüra tajutera oset/ mitsüksü/ear-buds agi tetushi.
- School-i aoer tanur kati anasa nungi tesayuri jembiba ola mangashira doctor dangi anir oang.
- Tenarong agi mangashii akümba (aser Tenarong tashidak balala dak sendakba) ya tekümdangtsü meratem agi nungang paidoktettsü akok.

**Tenarong agi mangashiba temaitsütem**

- Tenarong agi junga mangashiba
- Züngdangpi akongba
- Tenarong ashiba mesüra tzü aluba
- Tangari jembiba junga mangatetba
- Ana nung alirtemi jembiba junga mangateter/mangashir ta meteta akümba.

**Department of Health & Family Welfare  
Government of Nagaland**



Karo, North Sumatra, Indonesia nung aliba Mount Sinabung nungi volcano pokteta adokba mapang tangokba noksa ka yangi angur. Indonesia nung active volcano 120 dak tema aliba rongnung 2,600-metre (8,530-feet) volcano ya ka lir, koba Pacific "Ring of Fire" ta nüngja agüja aliba tesem nung lir.



## Pelaba Lemsateper



ASO 21/11/1924 ~ ASÜ 23/02/2021

Onoki teti meima aliba **Rev. K. I. Yanger** (Yaongyimsen), February 23, 2021 nü Model Village, 5th Mile Dimapur nung par kidang pa temeim kinungtsü aser chirnurtemi muketbanger lia pa iba akümlü nungi pila orr onok mangyim-jashi nung alidang shirnokisa temeim sayua aser mapa tajung balala agi onok nungita yariogo, nenok ajak dang asür kinungertemi pelaba lemsateper. Pai kinungtsü, chirnur aser anükapang trok, semchir 26 aser tanabuba semchir 15 toktsür süogo.

Kinungertem, kiyongertem, medemertem aser tembartem, Arogo balala, tamangba aser lokti tentet balala aser tongtipang nübu ajak den ozü molung taroktiba nungi lemsatepba tepela agizükangma. Iba ama asükhu mapang, nenok tsüngdong arua sarasadem aser tenla tajung agi onok nungita yariba ajanga iba tako marok koktetogo aser tanüla nung tashi agütsüogo. Tajungsang Tsüngremi nenok ajak moajangma.

**Temeim Kinungtsü, Chirnurtem & Anükapangtem,  
Semchirtem & Tanabuba Semchirtem.**

## MAMATETER



TASOBA :  
12/09/1934

TASÜBA :  
03/03/2020


**Asür T. Lipok Jamir (Changtongya)**

Molung zürep anogo ajurur küm ka süiogo. Onoki kanga meimba obala iba lima nungi anir orr -

Tangari mangudang, Ola madoki nüktzü aika yimdoker  
Onoki tasü itta liyonga aotsü meranger,  
Saka na, ozü sarasadem tongshi maliba kanga tasak lir,  
Naji onok asoshi tetemsü tebu ka dang masü, tesayur  
tajung ka liasü. Nü taküm onok asoshi temoatsü liasü.  
Onoki na kanga meimer Oba !

~ Temeim Chirnur aser Kinungertem.

## TSÜNGREM TAOCHI AGI KUMZÜKBA TEMEIM OBALA



**I. AORAMOK PONGEN**  
16.03.1950 -18.02.2021

Obala shirangba mapang nungi tasünü tashi ana aser talang nungi kwikati nübu, rongsen aser sarasadem agi yariogo nenok ajak dang kanga pelar. Asen Teyanglur Tsüngremi nenok ajak moajang ta ozü sarasadem.

Temeim Kinungtsü aser kinungertem.

## Diphupar nung Alcoholic Anonymous sentong agiogo



AA Advisor, Diphupar

Pastor, Diphupar "B"

Pastor, Unity Village

Pastor, Padumphukuri

**Dimapur, Metsüremi/March 02, 2021 (TYO):** Deobar (28.02.2021) nikongdang 3:00 ako meta AO Baptist Church Diphupar nung Alcoholic Anonymous (AA) mezüng telongjem sentong agiogo. Iba sentong ya "To bring innovation to the Life Transformation programs within the Church" omen nung ajemdaker agia liasü.

Alcoholic Anonymous (AA) mezüng telongjem sentong nung AO Baptist Church Padumphukuri, Diphupar B Ao Baptist Church, Unity Ao Baptist Church aser Ao Baptist Church Diphupar nungi AA züngsemtem denogo; aser

sentong nung L. Yanger Imsong President AA Diphupar aser Secretary Imkonglemba Longkumer na menden liasü.

Ao Baptist Church Diphupar nungi Deacon kati iba sentong tenzüka sarasadem aser pai sentong nung adenertem pelashishia agizük.

Arogo balala nungi AA züngsemtem iba sentong nung denogo, kong züngsemtemi Life transformation Camp nung madandang aser iba camp nung dener sülen parnok taküm nung ajangshibatem kuli agütsü.

AA züngsem kati Life Transformation Camp nung dener sülen nungi pa taküm melenshiba aser küm asem tashi

pai temesepba chiyongtsü/yi mekongshii aruba; aser pai temesepba chiyongtsü achiajem masüba ajanga küm asem tsüngda pai ali kimung tilaka aliteta, ki tilaka yanglua aser gari ka alia par kibong den pelashishia aliba kuli agütsü.

Iba sentong nung shilem agir Arogo balala nungi sannüker temi agüja aliba omen nung ajemdaker jemiogogo aser Arogo nung Alcoholic Anonymous sentong agiba indang tajangzüktemji:

1. Iba sentong ajanga yi ajemertem maitüsü jangjashitsür aser loktii parnok agizükba metetdaksür.

(Maneni tapak 10 nung...)

## Office of the KOHIMA JANGPETKONG SENSO TELONGJEM KOHIMA : NAGALAND

### TENÜNGSANG AGÜTSÜR

Kohima Jangpetkong Senso Telongjem-i (KJST) Er. Moatemsu Aier Chief Engineer (Power) Govt of Nagaland, Pa Kohima Aor Officer Telongjem (KAOT) nung Tir shimba atema union-i pa nem tenüngsang aser tetushi agütsür.

Tsüngremi asen lenir taküm aser wadang tarutsü mapang nunga ano maneni nüburtem asoshi moajang ta sarasademtsür.

Sd/-  
**B. Alem Pongen**  
President

Sd/-  
**I. Wati Walling**  
General Secretary

## ALI AYOKTSÜ LIR

Naga United Village, Daily Bazaar  
nungi minute 2 shi pilar.  
Rs 220 per sq.ft (8000-9000)  
Mobile no. 9362577022

## Happy Birthday

Tenüng : Sentikokla Jamir  
Tasoba anogo : March 3, 2019  
Küm : 2 (two)  
Talidak : Signal Angami,  
Dimapur

Tsüngremi jala taküm küm ana (two) tashi lenaniba asoshi Tsüngrem tenüng asanger. Tsüngremi maneni la nem arishi aser anema aliba taküm moajang ta sarasademtsür.

Temeim oja, oba, obo, aser  
kinungertem.





## Qatar Total Open: Sania o Andreja na quarter-i iogo



**Doha, Metsüremi/March 02, 2021 (Agencies):** Qatar Total Open asayamung nung India tsür star Sania Mirza-i külem tarep Slovenia tsür Andreja Klepac nati Round of 16 asaya nung takok ngua asayamung quarterfinal-i iogo.

Round of 16 tetsür tarep asaya nung Mirza aser Klepac nati Ukrainian tsür tarep Nadiia Kichenok aser Lyudmyla Kichenok madak 6-4 6-7(5/7) 10-5 agi takok nguogo. Ita 12 nung iba asayamung ya Sania

Mirza indang mezüng asaya alitsü aser taoba küm kasa asayamung (Qatar Opan) nung lai tesüsa shilem agi. Iba mapang alima ajunga asünga COVID-19 wara tenokdanga ajanga saisapong ajak anenja liasü.

Taküm January ita, Mirza-i la dak coronavirus tashidak menaba osang metetdaksü.

Covid-19 tashidak putetba sülen lar tanur arishi küm 2 tain den pilar alitsü ya timtem ajangshia aruba rongnung

tasaktiba liasü, ta lai lemsatep.

Iba wara (coronavirus) ya asayamenü ka mesüra zübazülema mebilemtsüla aser iba tashidak nungi kümzüka alitsü asoshi akok tashi ajaki kümdanga alitsüla.

Taoba küm, Asia/Oceania category linük atema Sania Mirza-i mezüngbuba Fed Cup Heart Award takok angu. 2020 indang regional Group I nominee asem atema vote 16,985 nungi Sania-i vote 10,000 dak tema angu.

2016 küm Fed Cup Play-offs nung India-i shilem agiba külen nungi taoba küm Sania-i Fed Cup nung mezüng asayaogo.

Sania-i iba jenjang ajangzüktetba nung ajemdaker, lai ashiba agi, ni iba award (Fed Cup Heart Award) ya linük nem bendanga agütsüner aser coronavirus wara anema raratsü asoshi iba award senpet sen ya Telangana Chief Minister indang Relief Fund nung tenla agütsüner.

## Taoba Barcelona chief Bartomeu chiokogo

**Barcelona, Metsüremi/March 02, 2021 (Agencies):** Mongolbarnü, taoba mapang FC Barcelona president Josep Maria Bartomeu chiokogo, ta Barcelona court sangdong ka ajanga metetdaksü.

Maparen timi ketdang masüba aser ochimashi inyakba dak sendakba nung Hombarnü Josep pua liasü aser anogo ka sülen pa chiok.

Court sangdong ajanga angazükba agi, 2014 aser 2020 tsünga Barcelona FC president inyaksang Bartomeu aser pa indang taoba adviser Jaume Masferrer nati court nung 'statement' ka magütsüsi temeden amshi aser judge-i tena chioktsü (provisional release) lemtet.

Hombarnü anogo Barcelona club nung sendaktepa alir apur nisung pezü rongnung Bartomeu dena liasü.



Hombarnü Barcelona CEO Oscar Grau aser legal services director Roman Gomez Ponti na apu aser tatsüka dang lir tenabo chiokadok; kasa mapang Bartomeu aser Masferrer na Hombarnü aonung piyong Barcelona police station nung puoka ayu.

Iba bushisüngdanga mapang, police-i mita aoba kiojen pungo rongnung Camp Nou stadium nung club indang office tem dena lir.

Police-i ashiba agi, tesüba küm ka tejakdang nungi iba maparen bushisüngdangtsü tenzük aser February 2020 nung Cadena Ser radio station ajanga sangdongba osang ka nung ajemdaker iba ken o meshibangi dang bushisüngdanga aru. Iba osang ajanga, Bartomeu club president inyakba mapang social media inyakyim asadangtsü/mittsü atema club-i taa dalang agütsü firm tem amshiba temai adokdaksü.

Taoba mapang, vice-president Emili Rousaud, shiba taoba küm April ita iba ken o dak sendakba nung tanga director pungo den külemi mapa nungi anen, iba service atema taa tali agütsüba dak sendakba nung pai club aitsüogo.

Ajisüaka, Barca-i iba ya magizük aser Rousaud ang tai apu.

## Pur orr aliba Nigeria nunger kaketshir... (Tapak 8 nungi...)

Item tetsürtem aika tang tashi monguteti lir. Item teloktem ya rongsen dak dang rangloker inyaker aser parnok taginüba aser tejangraba tejangja ka mali.

Ajisüaka Islamists temi parnok atsü arutsü meranger ta tebilemtsü akar. Jihadists temi nisung 30,000 dak tema tepsetogo aser kidanger linük Niger, Chad aser Cameroon-ia prokshiaogo.

Ketdangsertemi aiür chanutem chiokdaksüsi atema taa kecha magütsü ta shiogo, ajisüaka analysts temi iba dak tamang maker aser security tsütsü mongintemi iba ajanga iba tesem nung nisung pur aoba tali akümtsü ta tsüba bilemer.

Tir Buhari shiba iba tesem

mesüngjemteti kümdaksüba atema aija arudar, pai pa item nisungtem nem manishidaksütsü, ta shiogo.

Mongolbarnü Buhari-i, lendong kecha mataloki tetsürtem chiokba atema pelaba lemsatepogo aser ashiba agi, nisung pur aoba ya pur aortem atema dang masü saka parnok kinungertem atema tajangshiba tamajung ka lir.

Nigeria leniri police aser military dang nisung pur aortem mita aotsü aser parnok nem tapet temerenshi agütsüsi shiogo.

2014 küm jihadist group Boko Haram-i Chibok nungi tetsür 276 pur aoba sülen küm ka lir 2015 küm Buhari ya mezüngbuba tir asütsü shim. Iba

tatalokba ya alima ajungai aija liasü.

Item tetsürtem noklang ka dak tema tang tashi kong ali mejangjai lir.

Buhari-i northeast nung mepetmesü aliba tembangdaksütsü ta shiogo, saka iba sülen tensa kanga mejungi kümogo.

Kasa mapang nung Islamic State den sendaktepa aliba Jihadists temi UN base ka amak aser Dikwa nungi humanitarian hub ka makbanga sülen aid workers, security aser humanitarian 25 sabanga ayu, ta source balala ajanga Hombarnü metetdaksü. Iba tesem nung Mongolbarnü tashi nunga maneni mangatetep adoka liasü.

## Ravi Shastri Covid-19 Vaccine agiogo

**New Delhi, Metsüremi/March 02, 2021 (Agencies):** Mongolbarnü, Ahmedabad nung India tebur cricket team indang head coach, Ravi Shastri-i Covid-19 indang mezüng mozü agiogo.

"COVID-19 vaccine indang mezüng dose agiogo. India nung iba wara anema raratsü asoshi bendanga agütsü inyakba atema medical nübu takoktet aser scientist tem dang pelaba metetdaksü," ta Twitter sabang ajanga Shastri-i pa mozü agiba noksa ka den iba olen lemsatep.

"COVID-19 vaccination achaayangba maparen dak sendakba nung Apollo, Ahmedabad nung Kantaben aser lar team-i takoktet yimya sayua Anepaluba atema parnok danga pelaba metetdaksü," ta taoba mapang India cricket team nung all-rounder asayar Shastri-i shisem.

Hombarnü (01.03.2021) nungi nübur nem coronavirus mozü agütsü tenzükogo. Kasa anogo Ato Kilonser Narendra Modi-a Delhi kübok All India Institute of Medical Sciences nung Covid-19 mozü agia linük tesem ajunga nung Covid-19 vaccination drive sentong tenzüktsü.

## PM Modi tenüng... (Tapak 7 nungi...)

"Party tashimaitba kümdaksütsü melena party asüngsashitsü atema Azad-i yimden yimsüsuba nung pa tajangshibatam amshia Congress len anitsüla," ta Choudhary-isa ashi.

Longkak aiteritem shirnoki party wako bener liasü parnoki, Sonia Gandhi aser Rahul Gandhi lenisüba ashishirtem anema tatem tashi nokdaksü, ta ashi.

Kasa mapang nung Ghulam

Nübur atema coronavirus mozü agütsüba mezüng anogo - Hombarnü aonung 8:30 ako tashi nisung lakh 29 dak temai online/ Aarogya Setu app ajanga register süa liasü, ta Union Health Minister Dr Harsh Vardhan-i ashi.

"Nenok den mejembidang yongi ni data repringdangogo aser aonung 8.30 meta tashi nisung lakh 29 dak tema iba sabang nung register süogo; aser nisung ka register süra, la/ pa kinunger züngsem pezü tashi register asütsü atema maangka angur," ta Hombarnü Dr Vardhan-i ashi.

Narendra Modi Stadium nung England den Test pezüsuba aser tatemba atema tang, Ravi Shastri ya Ahmedabad nung India cricket team den külemi renemshia mungdar. Tesüba anogo ishika tejakdang tembangba tasembuba Test-a kasa stadium nung asayaogo, kong iba Day-Night asaya nung anogo ana tsünga India team-i tesemdang team - England madak takok angu.

Iba Test series dak alaka, Ahmedabad nung India aser England tsünga T20 International series pungo asayatsü terenemba lir.

## Diphupar nung Alcoholic... (Tapak 9 nungi...)

2. Yi ajemertem tanela jenjang tajungba yanglutsü asoshi ajungmesor.

3. Yi ajemertemi pei taküm jenjang angatetsü aser kümdanga alitsü asoshi yarir.

4. Lokti den tesendaktep tajung alitsü asoshi parnok ajungmesor

5. Timtema alidang aser yi endoker lia tanaben bena arua ajemba mapang yi jemertem kati ka yariteptsü atema AA ya sabang ka lir.

6. Yi ajemertem iba temesepba chiyongtsü mamshii taküm tajungba melenshir alitsü asoshi yarir.

Maneni, NEAN indang

Chief Functionary ajanga tajungshi o jembi aser Ao Baptist Church Diphupar, Advisor AA-i tepela anküp o jembi. Iba sentong nung AA züngsem 100 den North East Artist Network (NEAN) indang staff tem denogo.

Sentong temer sülen Mission Board Ao Baptist Church Diphupar-i wawa menü ayongzüba den külemi sentong nung adener ajak chiyongdaksü. Taruba Alcoholic Anonymous sentong ya AO Baptist Church Padumphukuri nung agitsü, ta sangdong ka ajanga metetdaksü.

## BILEM DANGANG

"Na tangar ama ajak dang nungi khenyongi balaka ta bilemtetang."